

四庫全書

史部

欽定四庫全書

大清世宗敬天昌運建中表正文武英明寬仁信毅大孝  
至誠憲皇帝聖訓卷十八

察吏

雍正元年癸卯五月丁亥

上諭廣西巡撫孔毓珣據奏梧州府知府張若需等請陞  
補蒼梧道等缺蒼梧道員業已部選殷邦翰朕聞張若  
需居官聲名較優所以允行至其餘各員俱照爾所請

爾統率一省該屬員自必有深知灼見處始行奏請假若日後改易操行切毋存回護之念姑息從事今日因其賢能而保薦後日因其改易而糾叅正見爾之公正無私將朕此旨轉諭伊等俾各知警懼時加慎勉庶不敢恃被薦在前而稍有放縱也保薦一事甚難人或懷銜玉求售之心掩其不善而著其善一被愚惑他日受累不淺斷不可輕忽於一時也朕將合省百萬赤子付托督撫似此薦舉數人有何可疑而不推心信任其間

設有徇情納賄假公濟私實據斷不輕恕

庚寅

上諭大學士等刑部直省命盜案件主稿雖在刑部然必  
由三法司等衙門公同確勘畫題方行請旨今刑部議  
覆被盜疎防及人命失察等案有該督撫未將所屬地  
方官弁報叅者刑部於具題完結本尾聲明行令查叅  
到日再議嗣經該督撫有照例補叅者亦有援例請免  
者止用咨覆刑部既不再題又不照會都察院大理寺

衙門是以部中姦猾胥役得以操縱其事暗地招搖有部費者則為援引輕例且有竟將咨文沉匿日久潛消者如無部費雖督撫聲明在所可寬不准邀免欺隱朦混事同議異嗣後凡三法司會議案件本尾有帶及行令補叅者督撫咨覆到部其或處分或寬免作何完結之後令刑部知會畫題衙門公同刷卷如此則胥役不得萌逞故智上下其手矣

六月乙亥

上諭吏部兵部三年舉行大計五年舉行軍政其居官優者列為卓異劣者分別輕重置之八法所以澄叙官方勸善懲過典至重也朕思卓異八法所舉所劾不過十數人而平等供職不列舉劾者尚有多員如文官倉庫之盈虧辦事之能否武官騎射之優劣訓練之勤惰皆未填註考語是考課羣吏尚有遺漏之處也嗣後大計軍政除卓異八法照舊例舉行外其平等官員文職自知縣以上武職自守備以上俱於大計軍政之年令督

撫提鎮註明考語造冊報明吏兵二部務期秉公核實  
不得徇情任意顛倒是非爾等確議具奏

是日

上諭戶部各倉監督向有年限滿漢一同更換立法最善  
前任若有未清後任豈肯接受所以稽錢糧之出入而  
除虧空之弊端也惟通州坐糧廳貯有通濟庫每年動  
用輕齎等項司其出入關係錢糧數十萬兩而坐糧廳  
一差並無年限或滿員陞轉則更滿員或漢員陞轉則

更漢員滿漢參差更換彼此牽制回護勢難徹底澄清  
況在任日久倘有虧欠必至積累增多更難清理爾部  
可將通濟庫錢糧逐一確查務期明晰其坐糧廳一差  
嗣後或限二年或限三年滿漢一同更換庶接受之際  
不至含糊而弊端亦自此清釐爾部即確議具奏

雍正二年甲辰七月乙巳

上諭直省總督巡撫等引見月官內經朕改調人員特因  
地方緊要觀其人言動舉止似屬可用是以記名調用



然必俟任事後方可定其賢否若督撫不實心訪察而因朕一時稱許遂爾優容任其恣意行事豈朕改調之意乎再揀選命往各省人員該督撫亦不可因係揀選之人聽其妄為不行糾叅此等人係朕特用必當益加勉勵實心愛民方不負簡拔之意倘任意放縱有玷官箴即當從重治罪嗣後督撫題叅官內有此等官員著將原係奉旨調用或揀選命往不思報効辜負擢用之處於叅本內聲明

雍正三年乙巳四月戊子

上諭直省督撫等為政首重安民安民必先察吏邇年有司不能仰體

聖祖仁皇帝寬仁德意吏治漸致廢弛朕即位以來嚴加訓誡整飭官方欲其潔已愛民奉公盡職在朕並非苛刻亦非偏私乃有庸懦無能之督撫間有叅劾每向人云我若不叅恐非上意又恐他人叅劾於我不便以此等語解釋於眾似覺叅劾為迎合朕意而出於不得已

者即如浙閩總督滿保叅劾知府何國棟似屬迎合朕  
察其無貪污之蹟仍准留任則朕無成心可知矣前滿  
保曾奏浙閩屬吏已劾多員若再題叅恐致無人辦事  
魏廷珍巡撫湖南時亦曾奏稱屬員叅劾過半容再查  
奏等語夫屬員之去留惟視居官之優劣豈論叅劾之  
多寡朕心總出於至公爾督撫等安得以庸鄙之見偏  
私之心妄為窺測乎又聞外間議論云朝廷懲盜臣而  
重聚斂之臣此語尤為荒誕自朕臨御以來蠲免舊欠

錢糧不下千百萬兩江南蘇松之浮糧江西南昌之浮糧共免額徵銀五十餘萬此皆惟正之供尚且大沛恩膏特行豁免現今各省督撫大吏將諸項名色私派陋規裁革甚多莫非推惠於民尚得謂之聚斂乎至若虧空侵蝕以及貪婪枉法之輩蠹國殃民有干法紀既寬其誅已屬格外若又不嚴追完項一任貪吏優游自得國法安在耶此明係朋黨匪人懷私捏造悖謬之語以惑衆聽殊屬可恨故特諭衆知之願爾內外大小臣工

深知朕心凡事秉公據理不可稍存迎合之見則庶政皆得其宜而吏治民生均有攸賴矣

雍正四年丙午八月丙戌

上諭內閣吏治惟在得人而各省有司員缺甚多非廣收博取不足備庶官之位故數年以來各省官員經朕揀選命往者亦多然當其揀選之時或見其奏對明白舉止從容或見其條陳事宜似屬可採遂入於揀選之中命往各省以試用之又有奉旨特用之員大約因督撫

上司等薦舉保奏朕召來引見見其才具可用遂加遷擢以鼓勵之此等人員朕不過取扱於臨時並未曾試驗於平日實不知其居心行事何如也伊等洎任後自應倍加敬謹勉為良吏方不負朕格外之恩若自恃為揀選特用之員傲上陵下恣意妄行而該管上司以為朕所揀選特用之員不加約束委曲寬容則大非朕澄清吏治整飭官方之意矣朕以大公之心撫馭萬方凡屬臣工只論其居官之賢否以為進退豈以部選揀選

常用特用分別異視有所偏向凡為督撫者宜深知朕心切勿以其為揀選特用之員有意優待而姑容之倘居官不善即據實叅奏不為隱蔽不涉瞻徇如此則人皆知儆官皆得人而於吏治大有裨益矣

十月戊寅

上諭雲貴川廣湖南各省督撫直省地方官辦理欽部案件皆有定限其不依限完結者例有處分惟邊省苗疆間有督撫自行歸結之案地方官因無限期遂生怠玩

以致案件稽遲民人受其拖累嗣後遇有民苗爭訟事  
件該督撫嚴飭該管各官作速查審完結如地界兩省  
或有關提之人或有會勘之處兩省大吏務須和衷辦  
理不得互相推諉其有不肖有司託故稽遲巧為推卸  
者亦當指名題叅毋得徇庇

雍正五年丁未三月丙申

上諭吏部盛京五部司官多係本處居住之人互相交結  
瞻徇情面欺蔽上司朕屢降諭旨不能悛改若不盡行



調換難於整頓爾部將盛京本處之人現任郎中以下主事以上人員查明數悉行調來以京員用其員缺著在京各部堂官揀選辦事中等司官爾部帶領引見補用所遺員缺即將盛京撤回之員補授如此則盛京堂官易於辦理而盛京部院積習可以悛改矣

閏三月丙寅

上諭內閣凡州縣錢糧之虧空總不出侵欺那移二項當其侵那之時官固主之而經手之經承自無不知也乃

不行稟阻且從而懲憑之以便作姦分肥迨至本官監  
追而經承且優游於事外本官問重罪而經承僅得不  
行稟阻之處分故凡虧空纍纍多由於官吏之相成也  
朕以為經承庫吏經管倉庫之人亦宜重其處分之例  
更定以勸懲之法凡州縣官到任先揀選殷實老成胥  
吏二人充錢糧總吏通詳報部凡徵收錢糧即令隨徵  
報解不得存留內署承辦五年該縣無虧空者即將總  
吏咨部以九品雜職即用本官少有虧空該總吏力行

稟阻如不聽從許徑赴司院呈明免罪若該吏不行稟阻致本官以虧空糾叅即將經承一同監追減本官一等治罪如此則經承有所勸懲不敢順從本官擅動國帑亦杜絕虧空之一法也

乙酉

上諭內閣各省建立忠義節孝祠宇及賞給老民老婦布絹米石皆係朕之特恩凡地方有司自應實心奉行以彰朝廷曠典昨據安徽巡撫叅奏太湖縣知縣冒開老

婦名數至二千餘名之多即此則各省有司之奉行不能無弊可知矣建立忠義節孝祠宇表揚德行在地方有司獎善慕義之公心即捐輸已資亦當勇往今朕動用國帑為之建立而承辦各官尚忍於冒銷錢糧草率從事以致易於傾圯有此情理乎著行文各省督撫詳加察勘有無冒銷果否堅固之處不得容其朦混並令各地方官將所建祠宇造入盤查冊內前後交代倘工程不堅未久即至坍塌者仍著落原辦之人賠補至於

永遠照看修葺則係地方官分內之事若能隨時整理所費不過數金多亦不出數十金甚易為力嗣後責成於地方官則彼必視為已事時時留心大於祠廟有益倘准其動用正項錢糧修理則不肖有司必至借端開銷而姦胥猾吏又從中侵漁入已有名無實屋宇必至頽壞負朕彰善闡幽之至意矣太湖縣冒開老婦名數業已被叅各省州縣必有冒濫開銷及胥吏朦混侵蝕等弊著各省督撫一併確查如該地方官將浮冒之處

自行出首免其治罪倘仍隱匿不報或經旁人告發或被督撫科道等題叅定行嚴加治罪

六月丁亥

上諭內閣學政一官所以化導士習養育人材職任甚重近年以來各省督學諸臣頗能仰體朕心祇遵朕訓矢公矢慎杜絕苞苴深可嘉獎但向來學政恣行貪劣以國家興賢造士之途視為射利營私之地此固本人之不肖而亦大半由於提調官員贊成之也其學政之秉

心貪劣者與提調官通同作弊固不待言而學政之可與為善可與為惡者提調官則引誘之或挾制之使不得全其操守而於其中網取厚利此提調官之惡習而天下之所通知者也學政原有關防若提調官持正秉公則學政必不能肆行無忌學政果能公明廉潔提調官更當敬禮而玉成之豈可反導之為非乎提調與學政相為表裏嗣後學政聲名不好應將提調官一併議處其如何定例之處著九卿會議具奏

七月丁巳

上諭吏部各衙門筆帖式在部院辦事者必當慎重揀選  
補用方於部務有益嗣後補用筆帖式時爾部將應補  
之人俱帶來引見朕酌量補用再筆帖式內若有不願  
在伊本衙門行走因而告病解退希圖另補好缺者其  
起補時俱著於伊本衙門缺出補用再盛京人員赴任  
向來原無憑限往往補用之後經年累月竟不到任其  
堂官亦不咨查至現任官員有告假來京者亦多無故



稽留不回本任以致部務廢弛此等風俗不可不  
加意整理嗣後選補盛京官員以奉旨之日為始扣限一個  
月到任若有違限者該堂官查明咨部題叅照例議處  
除公事差遣外有告假來京者該堂官奏明奉旨給假  
方准其來京

雍正六年戊申五月己巳

上諭內閣國家舉行大計乃三年考績之大典其中卓異  
人員皆加以特恩不次擢用誠以該管上司為國家薦

拔人才必深知灼見然後列為卓異斷無有徇私受託  
草率冒濫以負國恩而辱鉅典者而到任未久之上司  
不能深知屬員之賢否又准其題請展限以俟確訪如  
此則屬員人品之邪正自無有不能辨晰之理乃見有  
從前卓異之員而後任內竟至貪贓枉法罹於重罪者  
夫以三年之久數百屬員之多保舉數人以光大典則  
非一時應詔薦舉可比也其人既犯貪贓枉法之條則  
平日必係行止姦邪之輩又非尋常註誤及才力不及

之類可比也督撫提鎮等專以察吏為務而乃以此等之人列為卓異及至敗露之後尚可藉口於知人之不易不能保其將來乎此等若不定以處分恐相沿日久必有濫舉失實之弊嗣後文武卓異官員有犯貪贓不法之款而審訊確實者將從前列為卓異之上司一併議處倘於該員未敗露之先有能查出叅奏者免其處分其如何定例之處著九卿詳議具奏

七月戊午江西巡撫布蘭泰叅奏清江縣知縣牛

元弼祈雨不親屠禁方開張筵唱戲政務不理臨  
江府知府吳恩景代為隱飾請均予革職

上諭內閣牛元弼於屠宰開禁之後開筵唱戲不比祈禱  
之時若牛元弼平日性好聲歌耽於逸樂則布蘭泰何  
以不早行叅奏至所叅政務不理亦當實指其廢弛者  
何事今因一時意見遽將該縣嚴叅並知府一同革職  
定例內屬員犯貪贓重罪者知府徇庇及失於覺察其  
處分止降級調用今因屬員唱戲而遂將知府奏請革

職似此越例之事幾有作福作威之意矣朕之待督撫大臣深加信任常有督撫叅劾尚輕而朕從重處分者總以揆情度理期於公當而已凡為督撫者當為國家愛惜人才而於叅劾之間尤當加意慎重若誤去一幹員其過更在誤薦劣員之上蓋薦一劣員而誤用之異日自然敗露若將幹員誤行罷斥則其人終身放廢不可復振天下人才幾何豈可因一時之喜怒而濫行摧折乎察吏之道公明二者缺一不可若存心本公而識

見不到必致為屬員所欺瞞浮言所蒙蔽布蘭泰之存  
心雖無徇私而少知人之明且瑣屑不識大體地方雨  
暘之時若水旱之為災全係乎督撫大臣之感召若果  
能布德存仁安民察吏自能上感

天和豐亨有慶若政事有關舉劾失宜以致雨澤不能應  
時而降此時徒恃祈禱之虛文已屬庸鄙之見而乃欲  
諂過於屬員以謝已之責不亦屈抑之甚乎牛元弼吳  
恩景不必革職若二人任內另有虧空劣蹟著布蘭泰

查明續叅再降諭旨若別無款蹟可叅著將牛元弼吳恩景送部引見候旨另用

乙亥

上諭內閣前山東叅革知縣朱成元令家人叩閣一案朕命學士繆沅前往審理據繆沅將朱成元蒲臺縣任內餽送巡撫布按各官規禮印簿查出陳奏朕一一閱看知係朱成元任內二十餘年餽上司之陋規而自雍正元年以後仍復餽送如故已交部嚴察議奏自朕即位

以來嚴飭官方禁止私賄又恐督撫等官用度不敷暗中巧取是以給與養廉之項俾其公私有賴俯仰從容庶永杜苞苴以為澄清吏治之本蓋上司既受屬官之餽遺又何以禁止屬官之貪墨甚至以餽遺之多寡分情誼之厚薄則屬員之優劣何由辨別而吏治尚可問乎各省督撫養廉之項皆經奏聞奉旨者司道等官亦皆於公用內支給其無公項可支之員亦應於督撫前陳明准其收受何項以為用度豈有朝廷既給養廉而



仍收受屬員陋規之理今觀山東巡撫司道等官之私受陋規如故則他省或有似此欺隱私受者亦未可知著各省督撫一一嚴查據實陳奏在地方官薪水之資自不可缺但於屬員之手接受節禮陋規則斷乎不可目今各省內或有尚未分給養廉之員著各省督撫悉心商酌辦理奏聞寧可以州縣應出之項解至藩庫從公發給而不可使其自相授受廢公議而徇私交留禮儀交際之名而長貪婪賄賂之弊也倘再有私收規禮

者將該員置之重典其該管之督撫亦從重治罪

八月己卯

上諭直省督撫等知府一官管理通郡有察吏之責如知府得人則察吏以安民於地方實有裨益但知府內有僅係循分供職不能察吏而又素無過犯不至於叅劾者此等人員若令其久任地方於屬員賢否必不能詳察周知於吏治無益著各省督撫將現任知府詳加甄別其有才具中平不能察吏者一面具題以在京部屬

改補仍令該員暫留本任辦事一面於本省同知以下知縣以上等官內揀選能勝知府之任者保題送部引見如所保人員可用准其補授俟伊到任後著前任知府交代清楚來京以部屬之缺改用如此則因才器使辦理部務得人而各省知府均屬勝任之員矣若所保人員到京引見時朕察其才具亦屬中平則仍將前任知府留於原任各省督撫宜秉公詳擇以副朕澄叙官方之至意

雍正七年己酉正月癸丑

上諭戶部朕聞糧船過淮所費陋規甚多有一幫費至三四百金者旗丁既多苦累勢必多索於民甚為漕政之弊嗣後著派御史二員前往淮安專司稽察之任不許官吏人等向旗丁額外需索以致擾累其糧艘攜帶物件除照例許帶外該旗丁如有夾帶私鹽及違禁等物者亦著該御史稽察但不得過於吹求以致糧運遲滯至糧船抵通之時其該管衙門官吏及經紀車戶人等

恐有額外需索陋規者亦著派御史二員前往稽查差往淮安之員著於二月初派往差往通州之員著於三四月內派往不必拘定滿漢各一員著都察院按期開列請旨

五月庚申

上諭內閣凡遠省烟瘴之地及沿邊沿海之區因其險阻荒涼或民情難治是以有司缺出或揀選補授或將內地之員保題調補該員到任之後有歷俸三年即陞者

亦有五年即陞者所以恤其苦而賞其勞加恩於常格之外也乃向來督撫等徇情受託往往庇護私人以保題烟瘴邊缺為名俾得速於陞遷仍將其人委署近地輾轉留滯而本任竟屬虛懸是以緊要之缺轉成閒曠之所矣近年以來雖州縣正印官不敢仍蹈故轍而同知通判等員則聞尚有借委署他處之名不到本任延至數年俸滿居然得以陞遷者此等弊端甚有關係嗣後著嚴行禁止倘有應行署理之處著該督撫就近差

委不得使屬員巧為規避之計倘有仍前營私作弊者  
經朕查出定將該督撫及本員一併從重議處

閏七月壬午吏部帶領各督撫保舉之知府引

見

上諭曰知府一官承上接下以察吏安民為要務督撫統  
轄全省地方遼濶屬員多至百數十員察核賢否自難  
人人確當所賴者汝等府道耳一府所屬其多者不過  
十餘州縣耳目易於周知如能與督撫同心協力則舉

劾悉當吏治自然肅清但不得背公違理迎合督撫之意如屬員果賢督撫或有苛求爾等須竭力保全不可搜求詳揭若係不肖之員雖督撫密露庇護之意亦不可委曲順從蓋劣員貽誤地方即此時順從督撫曲為徇庇將來倘被新任督撫題叅徒然貽累已身若秉公察吏獲罪上司即被叅劾至於降革朕調來引見面加詢問果係情真理當必將誤叅之上司嚴加處分在汝等何害乎至秉公持正之督撫爾等又不得與所屬人



員通同欺詐朦蔽譬如督撫與朕必能一德一心方可整官方而清吏治若各懷欺隱之心朕亦難於辦理矣從來人材難得朕欲爾等察吏並非苛刻搜求細事以叅劾詳揭為能如屬員之過出於無心情有可恕務必盡心教訓冀其悛改至再蹈前轍然後叅揭方不屈抑人才爾等皆有志上進之人若能協同督撫報劾國家撫綏百姓將來陞授大員時自有賢能屬員來相贊助也古語云使天下無一夫不獲其所實非人力不能之

事一府之大或一人之力不能周到若一州縣得一好官則一方百姓自受其福庇推之天下州縣各得其人豈非匹夫匹婦各得其所之明驗乎所以治天下之道惟在察吏一事再近來外官多有視督撫之行事以為進退者如遇才守兼優不徇情面不避嫌怨之督撫即踴躍向前若遇中等督撫則凡事因循觀望不肯盡心殊非臣子竭誠供職之道爾等總宜改除陋習勉盡職守以圖上進若不公忠勤慎報効盡職不惟深負朕恩

且有何顏面以對保舉之人而忍貽累於知己之上司耶爾等赴任務期夙夜凜遵毋負朕諄切訓誨之至意

十一月己亥

上諭內閣各省兵丁於糧糈之外給以季餉所以撫養士卒令得仰事俯育以為地方捍衛所關甚重而朋銀一項於俸餉內扣留貯庫為各營買補馬匹之用亦國家恤兵至意也近聞直隸布政使衙門姦吏於請領朋銀時每匹扣陋規二兩至二兩五錢不等直隸如是他省

大約皆然夫倒馬立有限年報銷復有成額豈容姦胥舞弊侵扣嗣後著各督撫及布政司查照定例按期給發如有姦吏增減剋扣遲延等弊各該督撫即行拏究按律重處倘督撫失於覺察布政司不能釐剔弊端朕有訪聞定一併嚴加議處至兵丁歲底預借春餉及支放季餉亦聞有不肖餉書於放餉則需索季規於借餉則科斂借費此種姦弊深可痛恨著各督撫一併嚴查禁革務須按季給發不得遲延該部通行直省督撫布

政使將朕諭旨刊刻曉諭俾官吏兵弁等咸知之

雍正八年庚戌五月壬辰湖南安陸府知府談九

叙等恭請

聖訓

上諭曰知府一官有承上率下之責關係吏治民生最為緊要爾等勿視為傳舍但務逢迎上司以圖陞遷為榮身之計果能察吏安民實盡其道即使終身不得遷轉亦足留名譽於將來若一味請託鑽營希圖保薦縱一

時倖獲寸進而公論難免何能掩人之耳目哉刑名事件知府尤為上下關鍵務期明允公當地方始無冤民不可聽屬員懇求亦不可畏上司駁詰而草率苟且以致訟獄顛倒下結民怨上干

天和若催科一節固有考成果遇水旱災荒自當據實申詳加意撫恤不可隱匿以圖省事亦不可捏報以滋弊端夫寬大惠愛者乃為政之要道朕非令爾等嚴厲苛刻以從事也但古人云養稂莠者傷禾稼惠姦宄者賊

良民若保全貪官污吏以博長厚之名縱容地棍土豪以沽安靜之譽此大有害於人心吏治者也沽名邀譽乃居官之大患大凡在任時貼德政之歌謠離任時具保留之呈牒皆非真正好官也惟去任之後紳衿百姓思念不忘則不愧古之循良矣知府與知縣不同知縣為一邑之宰果能殫竭心力使四境之內民人樂業便是良有司至於知府則有統轄屬員之職若各屬之內有一人居官不善在知府分內即為一分曠職不可云

潔已謹守遂可無忝牧守之任也天下人才難得倘過  
於苛刻摧殘則因細故微瑕而至於放廢終身者不少  
矣總之遇好官則當愛重保護之遇中材則當勸導扶  
掖之遇劣員則當懲治罷黜之以此督課屬員有不觀  
感興起者無此情理也至於叅罰案件外官必不能免  
朕從不肯以情有可原之案廢棄賢員常有因公叅處  
之州縣官朕見其人才可用而逾格加恩遷擢者爾等  
勿存見小之念顧惜功名局於庸衆之規模而無遠大



之器量也將此諭旨吏部通行天下之知府直隸知州知之

雍正十三年乙卯七月乙巳

上諭九卿各省拏獲賭具查其製造年月在半年之內者大小官員有議叙之例所以獎勵臣工使之實心禁約賭博也今朕訪聞各省拏獲賭具均稱造賣在半年以內迨細心根究率多不實蓋地方官希冀議叙未免支飾邀功所恃上司稽核精詳庶幾功過不爽然上司又

例得並叙苟非公正不欺者勢必苟且雷同此朕訪聞  
最確者夫賭博之害最關風俗人心澄源端本則賭具  
在所必嚴計效責功則勸懲誠難偏廢然州縣身任查  
拏而上司則不過嚴為督率本屬分內之事今因並叙  
之例轉滋徇捏之端而不能收勸懲之實效應作何分  
別定例著九卿悉心妥議具奏

大清世宗敬天昌運建中表正文武英明寬仁信毅大孝  
至誠憲皇帝聖訓卷十八

欽定四庫全書

大清世宗敬天昌運建中表正文武英明寬仁信毅大孝  
至誠憲皇帝聖訓卷十九

訓臣工一

雍正元年癸卯正月癸卯

上諭直省主考官爾等俱係

皇考選用之人朕諒爾等必能自好是以特簡為主考官  
爾等務秉公考取學問優長之士果能不徇私情聲名

無忝則不但無負朕之選用亦不負

皇考愛養之恩矣回京之日朕自加陞擢如有徇私之處  
經朕訪聞定行從重治罪決不寬貸

四月丁卯

上諭滿漢文武大臣官員等朋黨最為惡習明季各立門  
戶互相陷害此風至今未息惟我

皇考允執厥中至仁在宥各與保全不曾戮及一人爾諸  
大臣內不無立黨營私者即宗室中亦或有之爾等若

以向蒙

皇考寬大幸免罪愆仍蹈前轍致干國法昏昧極矣豈但滿洲即漢人亦與一家骨肉無異何苦波累及之夫人之性情各有所向豈有與通國之人無不投契之理但辦理公事不可存私今諸大臣俱在朕前朕居藩邸曾與爾等議及私事密相往來乎

皇考知朕中立不倚是以命朕繼承大統朕自思之亦惟朕方能不戮一人無一人不保全耳朕非獨因

皇考付託之重實感

皇考四十餘年教養深恩委曲周至言念

弘慈昊天罔極此朋黨之習爾諸大臣有則痛改前非無則永以為戒爾等當思

皇考數十年寬厚之恩亦當共體朕委曲保全至意若仍怙惡不悛朕雖欲勉強仰體

皇考聖衷力為寬宥豈可得乎夫朕言是即宜遵行朕言非即宜陳奏朕未嘗拒也朕屢詔求言雖小臣欲進言

者咸得上達每多召入屏去左右令其面陳爾諸大臣  
非不得奏之人乃隱匿不奏退有後言某人不當用某  
事不當行誠小人之惡習也夫朕所用之人所行之事  
如有不當爾等身為大臣何難陳奏所言果是朕即用  
之如不奏而但肆譏議設有人詰以不奏之故能無愧  
於心耶賢者朕之所好爾等即宜好之不肖者朕之所  
惡爾等即宜惡之乃或其人為朕所信任盡心竭力於  
國家之事則反謂其專擅作威如此人孰肯效其所為



自取誹謗乎其或唯諾成風諸事不問但思自便其身  
為已則得矣於國何補夫君親大義也譬如父之讐則  
與之相愛父之愛則與之為讐為人子者有是理乎要  
之以君之好惡為好惡然後人人知改其惡而遷於善  
君臣一心國之福也傳之萬世亦有令名爾等其祇承  
朕諭

十月戊午

上諭內閣九卿詹事科道等從來用人之道必兼聽並觀

疇咨博採方能允當而無失朕於選人負勤加咨訪  
正以朕一人之耳目有限不若合爾諸臣之見聞始無  
遺漏也乃爾等僉云未能深知互相推諉夫百職在廷  
四方具集同鄉親故豈無見聞其賢者即小善亦應稱  
舉不肖者即小惡無容隱匿若知其賢而不言是謂蔽  
賢知其不肖而不言是謂黨惡即如月選官內有劉尚  
儉者係四川夔州府叅革貪酷知府劉天觀之子其父  
刻剥民膏為伊子捐職罪莫大焉如此之人豈可錄用

在廷豈無一人知之者乃俱緘默不言以此推之可見  
知而不言者甚多爾等之意惟恐結怨於朋友不若徇  
情容隱自保功名雖誤朕選用之事而不顧貽害於地  
方而不恤試思得罪於朋友與見棄於君父孰重孰輕  
全一人之功名與貽地方之患害孰大孰小即所舉之  
人為賢為不肖朕不過於引見時借以參酌自有裁奪  
並非責爾等保其終身無過致貽日後之累何必過慮  
乎嗣後務宜痛改積習苟有見聞即從實舉出進賢勿

避嫌退不肖勿避怨朕生平惟以真誠待人爾等亦當  
以至誠報朕尚其各抒忠悃勿負朕推心置腹之至意

雍正二年甲辰二月丙午

上諭八旗文武官員人等我國家念爾等祖父皆屬從龍  
舊臣著有勲績故加恩後裔量才授官冀收心膂驅策  
之效爾等自當恪守官箴勤勞王事建股肱之盛烈垂  
清白之家聲庶幾上以仰報君恩下以顯揚世美乃每  
見旗員居官不能悉體朝廷期望之意賢否雜出志行

不齊由筮仕之初輒謂旗人與漢人不同漢人無累可  
以硜硜自守旗人則本旗官屬需索多端親族往來責  
望甚衆萬一任滿又不免有當差之累此念一起百弊  
叢生不以忠君體國為心不以曠職殃民為懼潛通賄  
賂恣意苞苴惟期囊橐之充盡喪廉隅之守殊不思國  
家察吏廉者獎貪者懲滿與漢無二法也爾等果能潔  
己奉公始終一節休聲丕著惠政日聞朕自當從優擢  
用以示獎勵凡所過慮皆可不必如其不然則法網難

寬縱家擁厚貲安能坐享乎至於爾等家世武功業在  
騎射近多慕為文職漸至武備廢弛而由文途進身者  
又祇徼倖成名不能苦心向學玩日愒時迄無所就平  
居積習尤以奢侈相尚居室器用衣服飲饌無不備極  
紛華爭誇靡麗甚且沉湎梨園遨遊博肆不念從前積  
累之維艱不顧向後日用之難繼任意糜費取快目前  
彼此效尤其害莫甚朕特加諄諭自此以後出仕者各  
宜精白乃心靖共爾位人人以廉能自矢不得藉旗人

多累之說以遂其罔上行私之術八旗子弟各習其業  
文則潛心制義博覽詩書務求用世之實學武則嫻習  
弓馬講究韜畧預儲閫外之良材且各崇儉戒奢安分  
循禮父誠其子兄誠其弟與其恣情縱意博一日之豪  
華何如量入為出謀百年之生計與其蕩檢踰閑作無  
藉之匪類何如謹身寡過勉有用之事功以報朝廷以  
綿世澤以敦風俗以保身家顧不美歟大雅之詩曰凡  
周之士不顯亦世蓋欲疏附後先之子孫亦世世修德

與周匹休也爾八旗皆佐命後昆深願克紹前修榮名  
悠遠國家亦重有賴焉其各欽承毋忽

三月丁丑

上諭山東巡撫黃炳爾以父子兄弟同登仕籍繕摺謝恩  
爾一門榮寵固幸遭逢然必能互相砥礪感恩圖報方  
期福澤綿遠若倚恃家庭顯耀任情縱恣朋比黨援轉  
相請託順之者曲意容隱送之者多方排擠甚至欺君  
虐民有所不顧如此則目前富貴非為福基翻為禍媒



歷觀古今人事履盛滿之時不惟不敢稱慶更加謙謹所以世代子孫長保安全也爾可體此意傳親族之在仕籍者俱令知之

戊寅衍聖公孔傳鐸子孔繼溥率五氏後裔六十  
六人具表謝

恩

上諭孔繼溥等曰爾等是聖賢後裔與衆不同必心為聖賢後裔之心恪守先聖先賢之訓方為不愧朕誥學大

典爾等遠來特行召見面諭爾等慎修厥德以繼家聲

六月庚寅

上諭吏部直省督撫統轄屬員必中正和平推誠體察屬員有一善則獎勸誘掖以成之其微瑕小疵則多方訓導使之省改必至怙過不悛方據實題叅如此始能激濁揚清於地方有益若妄自尊大暴戾恣睢甚而一言不當即加叱辱如四川巡撫蔡珽慢罵屬官以致重慶府知府蔣興仁憤激而死似此褊急任性不惟有乖大

臣之體且恐屬吏相率顧畏阿順取容喪其氣節尚欲  
建立功名安可得乎爾部行文各督撫須仰體朕意正  
已率屬虛懷待下即檄行申飭亦無慢罵之理至尊卑  
相見尤有一定典儀毋得倨傲致長諂諛之風其部院  
堂官亦當和衷翕受待屬員以禮始不負朕委任之意

七月丁巳

上諭諸王貝勒公滿漢文武大臣官員等朕即位後於初  
御門聽政日即面諭諸王文武大臣諄諄以朋黨為戒

今一年以來此風猶未盡除

聖祖仁皇帝亦時以朋黨訓誡廷臣俱不能仰體

聖心每分別門戶彼此傾陷分為兩三黨各有私人一時  
無知之流不入於此即入於彼朕在藩邸時敬慎獨立  
深以朋黨為戒從不示恩亦無結怨設若朕當年在朋  
黨之內今日何顏對諸臣降此諭旨乎

皇考深知朕從無偏黨必能保全爾諸臣名節故

命朕繼承大統今日大小臣工所以安然無事得享太平

之福者皆我

皇考之恩賜也朕平日並未樹立黨援而登踐寶位爾等亦可知朋黨之無益矣夫朋友亦五倫之一往來交際原所不廢但投分相好止可施於平日至於朝廷公事則宜秉公持正不可稍涉黨援之私朕今御製朋黨論一篇頒示爾等須洗心滌慮詳玩熟體如自信素不預朋黨者則當益加勉勵如或不能自保則當痛改前非務期君臣一德一心同好惡公是非斷不可存門戶之

見即爾等彼此亦當互相砥礪時相訓誡行事共求當理諸臣不負朕心則朕可不負

皇考付託之重朕之不負

皇考全在爾諸臣之贊成朕得為天下之令主也諸臣不負朕朕豈忍負諸臣乎朕之用人加恩宥有未當之處或不能自信至於治人以罪無不詳慎間有法外寬貸之處不令人知者即下一嚴旨亦求至當從未隨意輕加呵斥此朕可自信者也如七十之惡亂舉國皆知發

遣在道竟寬其械繫臨行時王大臣內多有贈遺此朋黨未消之明驗也夫朕用一人而非其黨者嫉之罰一人而是其黨者庇之使榮辱不關於賞罰則國法安在乎嗣後朋黨之習務宜盡除爾等須捫心自問不可陽奉陰違以致欺君罔上悖理違天毋謂朕恩寬大罪不加衆倘自干國法萬不能寬朕雖未必盡行誅戮然或千人之中百人百人之中十人爾等能自保不在百十人之列乎爾等務期斷絕黨私同心輔佐盡誠極言

勿使朕躬有過此朕所厚望於爾等也凡人於朋友箴規尚不可背况君臣大義耶爾等當上念朝廷任用之恩下為身家子孫之計各勉之慎之

雍正三年乙巳六月丁卯

上諭內閣昔

聖祖仁皇帝明目達聰無微不照而關係國計民生之事尤殷採訪屢降

諭旨令內外臣工各抒所見不時條奏無非欲洞悉下情



興利剔弊期臻上理也在廷諸臣不能仰體

聖懷未見有剴切敷陳裨益政事者如科道等官之章奏或請開例捐納或請開設礦廠或請節省錢糧種種假公濟私之處不可枚舉皆在

聖祖仁皇帝洞鑒之中故近年來條奏之事

聖心裁擇其可行者見之施行其不可行者槩置勿用而言官之不得遂其私者反有

聖祖仁皇帝不甚納諫之妄議此等小人情狀朕在藩邸

知之甚悉疾之甚深故臨御以來諄諄誥誡期其各矢公忠直陳無隱夫條奏者原欲上以匡君下以澤民非為臣子沽名之具也朕原有旨即密奏中朕不行者若有真知灼見力懇施行仍准其露章陳奏非必止於密奏也因念諸臣之欲進言者或多所顧忌或恐招怨尤或有牽制之情或有不便顯言之處故令各人密封進呈其中言有可採而易於招怨者朕將摺內職名裁去發出或令諸臣會議或即見諸施行而外間不知何人

所奏其所以如此者無非欲人人盡其所言無所瞻顧迴避而朕得收聽言之實效於治理大有裨益也乃有詐偽之人因所奏既行而誇耀於人者亦有因裁去銜名無可稽考竟將他人陳奏之事據為已有者亦有謂出之自朕託言諸臣而實非諸臣之條奏者種種浮言深可痛恨又常見人文集中有擬稟未上之奏疏夫既有此疏何以未上既云未上何故存彙此乃欺罔之徒內懷詐偽外託忠誠遇事不敢直言故飾虛詞傳播人

口以欺世盜名也且更有以特恩施行之事而冒為已  
功者如蠲免蘓松浮糧一事係戶部所奏恩自朕出並  
無一人條陳近聞有人自稱為彼之密奏者人而無恥  
至於此極朕念為政之道首在得人故自即位以來於  
文武大小臣工皆留意簡選而於伊等陞見之日必召  
入面詢親加訓誨欲其潔已奉公勤修職業謹守法度  
愛養兵民丁寧誥誡至再至三無非諭及內外事務及  
勉勵官方之語而諸臣出外每每任意增減多方粉飾

以誇示於衆竟有與原降諭旨甚不相符者此皆大有  
關係著凡文武官員曾經面奉諭旨除不能記載者俱  
將訓旨一一詳細將年月日一同繕寫進呈内外文武  
大臣著自行封進其不應摺奏之員著封固交與該上  
司轉奏自今以後凡面奉諭旨者俱著繕寫進呈若不  
繕寫進呈但私相傳播及私自記載者即係假捏旨意  
定當從重治罪

雍正四年丙午正月乙未

上諭滿漢大臣等今日君臣同堂合宴海宇承平上下和  
樂皆我

聖祖仁皇帝深仁厚澤之所留貽也豈能暫忘思慕之情  
豈敢稍弛警惕之念乎朕之才德遠不及我

皇考今萬幾殷繁一人識力有限用是朝乾夕惕晷刻靡  
寧仰惟

祖宗付託之重下念萬民待澤之殷全賴爾諸臣同心一  
德輔佐朕躬使庶政無不就理兆民無不被澤以成熙

熙皞皞之風此朕所深望也夫移風易俗端於大臣是  
賴自古人臣之誼公爾忘私不可有游移瞻顧之心黨  
援朋比之習每見徇私不法之人好為夤緣互相請託  
揆之於義則請託實為可羞而度之於命則請託究屬  
無益且積習相沿遂成風俗既為子弟親戚營求作弊  
是教之不以正矣何足為其師範徒使子弟親戚有所  
恃以無恐終歸於壞品喪志不能上進其害可勝言哉  
朕於爾諸臣實以股肱手足一體相視爾諸臣亦當公

忠體國視君上如元首朕心若悠悠忽忽安於習俗而不知奮發鼓勵爾諸臣自待居何等耶况朕在藩邸閱歷四十餘年人情世態無不周知亦非可以欺隱蒙蔽者如年羹堯隆科多營私挾詐深負朕恩不旋踵而事敗露爾諸臣自度才幹伎倆未必能如彼二人若營私自便稍有不檢不惟薄待其身兼懼罹於國法尚可立身朝端為衆人之表率耶從來朋友箴規一言尚當聽受况君上乎朕諄諄誥誡者無非欲爾諸臣各矢公



心盡除私意如果能時時仰體朕訓彼此互相勸勉則天下之人觀感變化而風俗盡歸於淳厚爾諸臣之身家子孫亦並受其福矣

三月甲寅

上諭八旗漢軍官員等人臣事君須明大義固不可矯情立異尤不可挾私黨同習氣陷人流而不返每至乖於大義皆由察之不早挽之不力故也八旗漢軍向來惡習好通聲氣凡內外文武官員無論平素識與不識一

登仕籍必信息相通互相袒護雖其初意不過矜名圖利然積久不改種種偏私固結害正誤公漸成大惡矣夫立身事主豈有二理若果能孤介一秉至公自然能獲乎上否雖竭盡心力徒然敗品喪名而且犯義撓法况此輩要結原非至誠利則同爭害則各避究何益乎夫同此固結之心也於君則為忠於友則為黨忠則為君子而賞必及之黨則為小人而罰亦必及之雖至愚之人亦未有不欲為忠良之君子而甘為匪黨之小人

以避賞就罰者也毫釐之差天淵之判可不慎歟或有云人非聖人誰能無私又云瞞上不瞞下此等陋諺不知出自何典爾等既登仕籍奈何為此市井無賴之談以自絕於聖人而願為有私瞞上之人耶况朕從前局外旁觀三十四年一切情態知之甚悉汝欲瞞上而上究不能瞞汝不瞞下而下實互相瞞也深可憫歎漢軍中公正不阿之人朕皆委任信用如楊宗仁持身剛介既歿之後尚屢邀朕恩爾等若咸能實心遵朕訓諭效

法正人必寵渥厥身慶流後裔若面是心非不能悔改  
惡習不但身遭黜罰此風不息後人效尤必且貽害子  
孫嗣後各宜公忠自立共絕攀依官無論崇卑惟盡已  
職事無論大小惟盡已心人人皆能孤介則衆孤介和  
合而成一德同風之盛矣

四月庚午貴州巡撫何世璜奏請

訓旨

上諭曰地方要務朕既未親歷其境安能悉知即有所見

亦不過得之傳聞總賴爾等大臣無欺無隱據實入告  
君臣同心商酌則可耳至於居心立志應如何處朕今  
一一諭示於爾若能實力遵奉而行於地方吏治自大  
有裨益也不可惟務虛名而廢實事不可但求潔已而  
不奉公不可以因循為安靜不可以生事為振作毋偏  
柔善以盜寬仁之譽毋事姑息以邀屬負之感毋徇友  
朋之情而欺主母受權要之託而誑君黔省錢糧有限  
爾之操守朕所素知再者武備不宜輕視稍致懈弛當

十分留心時加鼓勵苗夷雖蠢而無知然亦人也若地  
方有司實意矜恤令其知感營伍嚴肅令其知畏朕可  
保其永遠無事恩威二字萬不可偏用偏用之目前雖  
有小效將來必更遺大患非為國家圖久安之策朕所  
不取鑑別屬員不可盡以科甲為人材而視他途為市  
井小人自古用人無方賢愚豈宜如此區別凡事虛衷  
秉公切勿預蓄成見平心以待彼來此應何事不得其  
理也勉之勉之莫負朕倚任之重

六月乙丑

上諭山西巡撫伊都立地方大吏一切關係地方事件務必實力行之不可視為具文即如嚴保甲查私鑄斷燒鍋禁賭博皆朕令爾等奉行之事倘接到諭旨毫不經意只發幾張告示行之州縣貼於通衢即以為我已奉行矣嚴禁矣是將誰欺乎要必實心遵奉細訪密查果有違犯重治其罪則懲一可以儆百使法在必行方為有益并諭令屬官使皆知奮勵辦理一切事件悉出誠

心即如盜案獲賊過半照案緝拏雖有成例然必設法  
訪查務期全獲抵之於法則人知畏懼盜源可清矣大  
凡為大吏者當正己率屬砥礪廉隅持身孤介固不可  
貪婪肆志亦不可矯飾偏枯不可一味姑容以貽悞亦  
不可謬加叅劾以塞責凡事悉準天理尊君親上善則  
歸君過則歸己人臣之義當如是也朕待臣下開誠布  
公爾等有何疑慮而不坦白乃心以取信於朕慶君臣  
之交泰乎其竭力經營殫心籌畫毋負朕簡任之意



十月庚申

上諭內閣部院大臣等朕宵旰勤勞勵精圖治諄諄以正人心端風俗為首務而欲人心風俗同歸於善必先去其營求請託之私而後可以成公平之化大臣者羣僚之表率也職官者士庶之儀型也大臣不能去營求請託之私則標準不立而百僚士庶相習成風更無所底止矣外省督撫藩臬皆地方大吏其所辦理皆地方緊要之事若在京大臣以私情囑託必致進退人材不得

其實聽斷獄訟不得其平種種倚仗勢力顛倒是非夤緣奔競之事皆由此起民生何由安吏治何由肅乎夫交以道接以禮聖人所不廢內外官員凡有問候書札及餽遺往來而無所干瀆者不必拒絕有關說請託者宜嚴行禁止地方大吏正當謝絕知交囑託之私情以除向來相沿之陋習在廷諸臣亦可舉國法以謝親知秉公去私共襄移風易俗之化慎之勉之

十二月庚辰

上諭內閣年來冬月封印之後政務畧有餘閒朕手書福字賜內外大臣諸臣奏謝皆稱受朕賜福之恩此世俗之言非正理也朕何能以福賜諸臣哉不但朕也即

上天亦豈能以福私與一人哉書曰惠迪吉從逆凶又曰天道福善禍淫易曰積善之家必有余慶詩曰自求多福古聖人之垂訓深切著明如此從來善惡之報如影隨形福緣善慶視乎其人之自取他人不能助纖毫之力也且所謂福者不在乎富貴貧賤之間有富貴人之

福有貧賤人之福或貧賤之人循理守分無患無憂其  
心志安舒四體暢適轉在富貴人之上是人人各有其  
福也朕之每年頒賜福字者蓋欲諸臣觸目警心時時  
存可以獲福之心行可以獲福之事如詩人之所言自  
求多福則諸福集於其身矣諸臣又嘗言賴朕之福此  
言亦屬非是蓋必諸臣皆有福方為朕之福是朕實賴  
諸臣之福也又必天下百姓皆有福然後為吾君臣之  
福是君與臣皆賴百姓之福也願與諸臣共勉修福之

道可耳



大清世宗敬天昌運建中表正文武英明寬仁信毅大孝  
至誠憲皇帝聖訓卷十九

# 欽定四庫全書

史部

世宗憲皇帝聖訓卷二十三

臣

永瑤恭校

編

修臣 裴謙覆勘

總校官原任中允臣 王燕緒

校對官中書臣 王 璣

謄錄監生臣 汪兆鰐

欽定四庫全書

大清世宗敬天昌運建中表正文武英明寬仁信毅大孝  
至誠憲皇帝聖訓卷二十

訓臣五十二

雍正五年丁未正月甲辰

上諭內閣覽諸王大臣等奏稱河水澄清二千里期逾兩  
旬為從來未有之瑞懇請陞殿慶賀朕嘗言天下至大  
庶務至繁斷非人主一身所能經理必賴內外臣工協

力贊襄然後可以成一道同風之盛若上有涼德之主而下皆臯夔稷契之臣則工虞水火佐理有人政務亦不患其不舉若上有堯舜之主而下皆共工驩兜之輩則耳目股肱無所資藉政務亦必至於廢弛故人君之道以得人為要而人臣之道以奉職為先此一定之理也朕統臨萬方雖刻刻有勵精圖治之念然必賴內外臣工共矢公忠各殫才力然後有實政實效及於吏治民生方可以感



天和而錫繁祉不然則朕雖有勤政之念豈能事事躬親  
辦理也今見數年之中荷蒙

上天

皇考默佑疊錫嘉祥茲又有河清之上瑞朕細推天人感  
應之理自非無因當由內外臣工能體朕宵衣旰食之  
懷洗陽奉陰違之習分猷効職有數端之善上合

昊天

皇考之心是以錫茲福慶以勵將來爾等試再思之人事

甫修僅有數端之善即邀

上天

皇考之嘉貺若此倘能益竭忠誠事事皆善則其獲福又當何如或由此而侈然自足怠惰前修則其獲譴又當何如可不慎乎可不懼乎況天道惡盈朕心方且因此益加戒儆所請慶賀典禮朕必不行朕念君臣之間實屬一體

上天

皇考既垂訓於朕朕即以此訓及諸臣

上天

皇考既錫福於朕朕即以此福及諸臣凡屬京官自大學士尚書以下主事以上內大臣都統前鋒統領護軍統領步軍統領以下叅領以上凡屬外官自督撫以下知縣以上武官自將軍提鎮以下叅將以上俱著加一級其王公等管理部院都統事務者應如何加恩之處著宗人府議奏自茲以往內外臣工當益加黽勉精白乃

心和衷共濟矢勤矢慎秉公去私凜

天鑒之匪遙念感應之不爽以至誠至敬仰承

上天

皇考之眷佑則受福孔多永永勿替矣勉之勉之

八月庚子

上諭大學士九卿等天下庶務殷繁斷非一人所能辦理  
朕宵旰勤勞勵精圖治而分猷贊理之任實於爾諸大  
臣是賴為大臣者必須視國事如家事方可謂之公忠

不負朕股肱心膂之寄如爾等自理家務必商酌盡善  
措置得宜斷無漫然為之聽其錯誤不為釐正之理至  
於教導家人約束奴僕其分別優劣賞罰寬嚴之間爾  
等亦斷無率意而行之事而獨至辦理公事之時類多  
苟且塞責漫不經心或隨衆畫題畫行而於其中之原  
委曲折茫然不知或心知其不可而瞻顧不肯直言以  
為非我一人之事不如隨班逐隊以免是非至於接待  
屬員如同僚友平時不辨別其是非不督責其過失及

至甄別之際又復瞻徇情面曲直不分種種陋習皆部  
院大臣所不能免古人云公爾忘私國爾忘家言人臣  
既以身許國即當置家事於不問也今縱不能如古人  
之體國奉公忘私忘家亦安可視國事家事截然分為  
兩途而輕重疎密其相去若是之遠哉庸臣具臣之習  
切宜深戒朕日以良臣名臣之道期望大臣爾等慎勿  
菲薄自待重負朕期望之心至於諸臣存心之誠偽朕  
觀其陳奏之言辦理之事即可洞悉其隱微或改變初

心或屏除舊習朕一見無不知之不可不自勉也夫人臣之弊莫大於迎合上意此朕所深惡而日加訓誡者朕欲大小臣工俱為好官爾等若欲迎合朕意何不即以勉為好官為迎合之首務則朕之心慰爾等亦無負於朕矣

庚戌八旗都統帶領各旗副佐領引

見

上諭八旗人員乃國家根本所關甚重養育教誨不可少

懈佐領者乃統轄一佐領之人俾佐領下人等皆不失  
生計不染惡俗養之教之使趨於善莫要於佐領爾等  
理宜為國家宣力正己率物教育所轄佐領下人佐領  
內有原管佐領有世管佐領有公中佐領原管佐領乃  
太祖

太宗時爾等之祖或率所部來歸或戰陣有功賞賜人口  
各編為佐領令其管理是爾等與佐領下人同是滿洲  
其中亦有從爾等之祖宣力國家得受世職逮於子孫



爾等理宜骨肉視之若自以為原管佐領將佐領下人  
視同奴隸而陵賤之豈惟國法不容亦敗汝祖勤勞所  
立之基業矣世管佐領因爾等之祖曾宣力國家或人  
材可用善於管轄故令其管理佐領世世相傳以至於  
爾等之身爾等理宜將佐領下人愛惜訓誨念爾祖之  
勤勞以永保累世所管之佐領也再管公中佐領之人  
特以其能理佐領之事能教佐領下人是以揀選令其  
管理益宜視佐領下人如同手足誘掖訓導誠切肫篤

則佐領下人無不成就佐領內事無不辦理矣夫佐領之管佐領下人無異州縣之於百姓州縣所轄地方或百里有餘或幾二百里戶口人民不下數萬徵糧斷訟事件繁多然猶可為地方興利除弊懲惡勸善俾庶民各遂其生一佐領下滿洲多不及二百人少或七八十人計戶不過四五十家世為同里孰守分節儉孰越禮奢侈孰孝弟勤學孰妄亂生事諒無有不知者也管佐領之人誠於佐領內之善者獎勸優待薦舉以鼓勵之

則善者益樂為善其劣者視如子弟初教之不改再則  
斥辱之誠如此愛惜而訓誨之雖係下愚亦必中心省  
悟倘有賦性頑劣怙終不悛者即申詳叅領都統等懲  
戒之或送部治罪以警衆人則佐領下頑梗之徒咸懼  
而不敢為非矣今佐領內或有不肖之人自恃身為佐  
領陵虐佐領下人不論是非恣意妄行其或昏懦怠惰  
之輩將佐領事盡諉之驍騎校領催轉相傳示其或貪  
鄙之輩不知愛惜反貪小利而朘刻之則佐領下人何

由心服何由成就是以朕今特令每佐領設副佐領一員協同佐領辦事和衷共濟倘副佐領目無佐領不問事理肆行無忌該佐領即申詳都統若佐領與佐領下人結黨目無副佐領朦朧作弊副佐領亦即申詳都統不可彼此瞻徇情而爾等以朕訓旨謹識於心將佐領下人教育約束勉習文武之業副朕樂育八旗人材之至意

十月癸卯

上諭滿漢文武大臣等凡為國家大臣者非爵位崇顯體貌魁梧之謂必其胸襟識量所見者大方可謂之大臣朕觀諸臣中有器量小者見朕賞賜則欣喜不勝見於詞色夫受賞而欣喜若此則受罰必怨忿於心矣朕之賞罰悉出大公總視乎其人之自取受賞者當思所以致賞之由竝思所以不愧乎賞之道則可以常保其恩受賞受罰者當思所以致罰之由竝思所以免罰之道則可以不至於再罰矣

雍正六年戊申九月甲戌

上諭內閣大凡為臣者必以報稱君上為心而不得有瞻顧身家之念古聖賢之教忠皆是道也蓋在平時則正其誼不謀其利明其道不計其功孝弟忠信一一皆盡其實而不可有一毫之虛假及乎居官則國爾忘家公爾忘私盡屏其偏陂黨同之習悉去其沽名市惠之念此之謂實心任事而智名勇功於是乎出矣夫臣下之用心在上未有不洞燭其隱微者古之良臣有嘉謀嘉

猷則入告於內而順應於外其誠意之交孚何如其懇  
摯苟或挾詐任術飾貌修文隱微有潛伏之私則必不  
能忠敬以事上而上有不知其情偽者乎凡學古入官  
者宜矢之以至誠將之以篤敬秉虛公以揆大中之則  
務正直以遵王道之平存忠君為國之實心務立身行  
道之大本以此自勉更以此交勉則可以成明良一德  
之盛矣

十月甲午

上諭諸王大臣等易經謙卦之辭曰天道虧盈而益謙地道變盈而流謙鬼神害盈而福謙人道惡盈而好謙蓋滿則招損謙則受益此一定不易之道古聖人所以惓惓垂訓也人之所以能謙尤在於公而不私和而不同周書之示誡則曰以公滅私虞書之陳謨則曰同寅協恭和衷哉公私和同之間實君子小人之所由分凡人立身行己待人接物未有不嚴辨於此而可以無失者也朕日以公和訓誨諸臣而能遵奉者少爾等同為國



家大臣彼此實屬一體若見彼有錯誤之處即當密告之令其悔改而聽受之人默感其意即改其愆方為正理今則見人有錯誤於背後譏誚之而當面且作褻揚之詞間有箴規過失者聽者不但不感且從而怨恨之身為國家大臣豈可蹈此等陋習子路人告之以有過則喜其樂於聞過者正其勇於改過也今人能自知其過者甚少如朕降旨詰責處分之人伊等心中尚懷怨望不能省愆何況朋友箴規之言安能欣然聽受乎易

曰君子以虛受人周子通書曰無欲則靜虛動直蓋凡  
人之心虛則明有所蔽錮則昏人有欲求好之心尚流  
於偏而不得其正况心意之間全是一團私欲蒙蔽其  
顛倒錯亂可勝言乎諸臣能公則可以祛意念之私能  
和則可以去阿比之習既公且和則自然能謙能虛於  
己則樂受規勸之言於人則能盡直諫之道人已之間  
兩得之矣

十一月己巳廣東將軍蔡良叅奏左營中軍副將

金國泰右營遊擊吳廷元酗酒不職

上諭兵部廣東文武官員每以飲酒宴會為事相習成風  
令將軍標下將弁羣聚酗飲致相爭毆此風不改官箴  
安在書經以三風十愆儆於有位曰敢有恒舞於宮酣  
歌於室時謂巫風又曰卿士有一於身家必喪古訓所  
垂豈非官方之炯戒嗣後該督撫將軍應將屬員嚴加  
申飭其或不悛即行叅處大凡居官者或遇節令之期  
或有喜慶之事設酒開筵原所不禁若以酒食遊戲徵

逐應酬不惟玩愒時日廢弛政務并起爭忿結怨之端  
有關大體各省文武大臣俱宜約束屬員時加訓誨庶  
於風俗官方並有裨益

雍正七年己酉五月丙午

上諭內閣屢年以來朕以天人相感之理諄諄曉諭內外  
臣工蓋朕實切敬

天勤民之念於寤寐之中而確見其感應之不爽尤願各  
省督撫有封疆之重任者體朕此心至誠至敬各盡其

道以為感格

上天之本惠我蒸民共登衽席朕竝非以年穀之順成有意歸美於大吏亦非以雨暘之差忒強欲卸責於臣工也假使為督撫者因朕有地方豐歉由於吏治得失之諭旨而欲自彰其善自護其短於奏報秋成或有溢美之詞於奏報歉收或有諱災之意則事

天為不誠事君為不忠臨民待下為不仁不信有此數端而欲荷

上天嘉祐錫福凝禧有是理乎况粉飾一己之聲名而不顧生民之休戚其何以對所屬之官民而無愧怍乎朕留心體察覺近來督撫等之奏報年穀間有此弊不得不通行曉諭以防其漸在爾督撫等返躬自思有則改之無則加勉况朕之見聞甚廣訪察維勤倘掩飾於此而敗露於彼豈不自取朕之輕視乎人臣事君之道惟以誠實無欺為本爾督撫等其共勗之

七月辛未

上諭都察院凡人臣辦事務須秉公持正不可存一恐懼  
好樂之心若先有恐懼好樂之心則心既不得其正事  
必不能合中或太過或不及皆非中庸之道所謂中庸  
者本日用常行之事即至當不易之理而人每多習而  
不察也且人臣事君尤當至誠不欺若稍存欺心便是  
獲罪於天試觀大姦大惡之人天不遽加之顯報必俟  
其罪惡貫盈全體敗露然後降之災殃以昭著於天下  
後世爾等必先問心若果能不愧幽獨方可質諸大廷

廣衆遇事又必須審定是非不可偏執已見自以為是如辦一事初信為是者寧可再加詳審將他事比較並將他人議論詳酌或有未協之處必求至是而後行蓋天下自有公是公非必心無私曲方能辨別是非凡被他人所惑溺愛不明其為害尚小蓋以人為憑可冀有時覺悟倘自身溺愛不明其為害也更甚而覺悟體察也尤難夫心懷偏私則一己之是非已不能定又何能定他人之是非乎大凡立心行事必從根本上用力方



能有濟若專務枝葉雖費盡心思於事無裨朕辦理天下事務廓然大公因事制宜實不預立成見爾等凡有條奏如果有益於國計民生朕自採納若預揣朕意曲為迎合或袒庇瞻徇畏首畏尾不惟於國家政事無補實難逃朕之洞察在國法何得寬貸也總之人情任勞易任怨難任怨之事不獨在臣工即為君者亦然但存心合乎天理雖有一二無知之輩肆為怨謗久之天下後世自有公論爾等果能公忠為國目下即被小人怨

尤日久自然消釋

上天必加垂佑人主必能體察爾等敬聆諭旨各思奮勉  
勿負朕教誨之至意

雍正八年庚戌九月戊辰

上諭內閣自古為治之道在於和衷孟子曰天時不如地利地利不如人和蓋天下之事未有不和而能有成者  
果能和矣則天地神明尚覺吸呼可通而況於人乎然  
能和之道惟在於公公則必不至於不和不公則斷不

能和此又一定不易之理朕所日日訓誨天下臣民而望其洗心滌慮信受奉行以共享昇平之福也文武雖屬兩途然同在一省一方之中同辦國家之事則不但有同舟之誼實如手足臂指之同在一身也人身一體不適則百骸皆為之不寧此亦顯而易見者奈何為私欲蔽錮而任肢體之互相戕賊以貽腹心之患乎數年以來朕留心體察內外同事臣工頗能遵朕諭旨勉矢和衷之義即文武各官同在一方而各殫其職無爭競

嫉忌之念者亦多有之此皆人心風俗之善亦該省文武大臣實心表率化導之功也惟有廣東一省惡習相沿頽風難挽文與武既分為兩黨而文與文武與武又各分為一黨如楊文乾石禮哈常賚阿克敦官達之互相排陷仇怨相尋則皆方願瑛一人從中播弄之所致至於文武彼此告訐之言不可殫述文官則言武職諸員或向知府包攬漏稅或向州縣囑託人情稍不如意即出謗言以勤謹辦事者為過於躁急以不徇私情者

為擅作威福又如兵米一項地方有司給與本色而營  
弁以不能折價為憾徃徃蓄怨於心此文員陳訴之大  
概也武官則言文職諸員貪鄙居心黨援不解恃有承  
審之柄藐視武途大小有司夤緣交結武弁若拂其意  
即啟釁端以為報復之計常有武職查拏違禁之事如  
賭博私宰等類而文員則置若罔聞或徇情釋放又如  
礦山聚衆至數千人係府縣官員之家人勾引奸徒開  
採布圖重利武弁遣兵驅逐以致結怨益深此武弁陳

訴之大概也年來似此等語達於朕聽者不止數處亦不止數人雖出於怨懟之口不足盡信然亦未必皆全無影響之談爾文武各員自思之膺國家簡命之榮受管轄兵民之寄乃以營私網利之故相傾相軋效市井無賴小人之所為而置人心風俗官方戎政於不問爾等不自知愧朕實為爾等愧之也況督撫藩臬而有袒護文官之心則武弁必有被其屈者矣提督總兵而有袒袒護武弁之心則文員必有受其枉者矣文員而有袒

護百姓之心則必有無辜受累之兵丁矣武弁而有袒  
護兵丁之心則必有無辜受累之百姓矣不和之故由  
於不公不公之害至使官弁兵民竝受其困為臣工者  
尚可狃於故習而不猛省速改乎巡撫統率全省文員  
提督統率通省武弁至於總督則兼文武而統轄之者  
果能秉公持正無黨無偏以己身為庶官之坊表而又  
時時宣揚朕諭俾其儆戒提撕若遇屬員有爭競告訐  
之事則以理判其曲直不存文武偏向之見過小者切

加戒飭過大者即入彈章俾強弱不得相陵是非無或  
倒置如此而屬員有不革面革心嚮風率教者無是理  
也朕今再頒諭旨通行曉諭著該督撫等遵照刊刻通  
省文武大小官弁各給一道俾令朝夕觀覽改前愆而  
敦善行倘再有蹈襲故轍罔知悛悔者則是冥頑不靈  
自違越於德教之外矣國法具在本人自無所逃而文  
武大臣表率無方訓導不力有忝封疆之任負朕倚任  
之恩亦定行嚴加處分不稍寬貸觀風整俗使亦當留



心稽察可也

雍正十年壬子閏五月甲午

上諭八旗官員人等昔人云和氣致祥乖氣致異此天人相感之至理古今不爽朕以此訓導天下臣民至詳且悉矣去夏今春京師亢旱地猶微動未息朕戒慎恐懼思過省愆幸邀

上天慈恩錫以霖雨不致大為災患然所以垂象示儆必有由來朕留心體察於旗人得一二事似有抑鬱不舒

之氣以致上干

天怒朕不得自寬衆亦各應自省也如用兵準噶爾一節  
八旗將士遠役於外父母妻子愁望於家或者以為朝  
廷不惜士卒有此可已而不已之舉不知準噶爾賊夷  
狡獪兇頑世濟其惡擾害我臣服之蒙古窺伺我西北  
之邊疆若不加創懲則蒙古不獲安居邊塞不能寧謐  
我八旗之人尚得優游燕處度外置之乎是知

皇考經理於前朕紹述於後皆出於萬不得已豈非窮兵

黠武欲拓地開疆而疲勞將士於沙漠窮荒之地也觀  
近日賊夷跳梁之狀以我朝大兵駐劄邊境而猶心懷  
覬覦敢肆狂逞則從前雖欲棄置不問以圖息事寧人  
其可得乎我滿洲八旗人等素有忠義之心勇敢之氣  
爾等祖父自從龍入關以及各處征討削平寇亂皆以  
捐軀致命為榮以老死牖下為耻今乃承平日久習於  
宴安因數年之征戍即生愁怨之心而忘乃祖乃父之  
勞績何志氣隳惰自暴自棄一至於此乎從來急公殉

難者享千古不朽之榮名而奏凱獻功者膺國家寵褒之爵賞豈但出征弁兵當勇往爭先即其父母妻子亦當深知大義遏抑私情務其遠大則忠君報國之悃誠必蒙

上天垂鑒默加福祐大功可以立成凡列在戎行者均受國家逾格之恩澤矣又如催追虧空一節聞八旗人等亦以為苦累獨不思居官之人侵盜國帑剝蝕民膏律以國法皆在不赦之列朕以習染既久人數衆多不忍

加戮特從寬典勒追還項以儆將來使知侵盜橫取之物不足以長子孫庶可以止姦貪而厲廉耻此朕之苦心實欲為人心風俗計也若云朕為財物計而為此綜核之事獨不思十年以來朕之減除正賦蠲免積逋與夫興修工程賑濟賞賚加惠於官弁兵民者所費不下數千萬曾無吝惜豈有惟與旗人較量錙銖之理哉且雍正三年以前之舊欠朕已令該旗大臣等查奏酌免矣朕之意旨旗人既未能悉知該管官員又不能宣布

開示每於催追之時過於嚴刻甚且牽累無辜此庸劣不忠之大臣奉行不善而更隱示以奉朕意旨致令若輩心懷怨懟朕旨果如是乎夫獲罪而不知悔沐恩而不知感此皆乖戾之氣均足上干

天和用是再頒諭旨通行曉諭儻八旗人等果能遵朕訓誨洗滌肺腸共矢愛君親上之懷永絕昧理欺公之習不但朕之沛澤施恩必先自旗人始而

上天福祐善良諸事吉慶亦可預信其必然矣

雍正十二年甲寅正月己卯

上諭諸王大臣等爾諸王大臣以元旦立春恰遇甲寅年  
丙寅月戊寅日甲寅時瑞雪繽紛竟日盈尺考之占書  
最為嘉祥豐年可慶為朕稱賀朕素不言祥瑞降諭至  
再至三爾諸王大臣聞之熟矣凡祥瑞者特其兆耳兆  
為吉之先見全在人事贊成凡靈芝卿雲麟鳳嘉禾之  
屬皆

天心所以示喜豈得不以為慶但須君臣益加修省以祇

承休命果能事上合

天心則祥乃成其為祥否則其事尚在未成何得遽為稱慶洪範恭之對待曰狂如或因有嘉兆而不加修省遂侈然自肆則咎徵特在轉移之間耳祥其可恃乎譬如爾諸王大臣朕以其人可用許以加恩其人一聞朕旨便自放縱頓改前操朕亦惟有收回成命加之以罪豈得更不轉移而仍以恩待乎朕於天人感應之際信之甚篤知之甚明信之篤是以一刻不敢自懈自逸知之



明是以不憚反覆申明誥誡詩云天維顯思無曰高高  
在上蓋面前虛空即是昊天足履撮土即是大地如人  
有七尺之軀拔一毫毛則通體皆知痛癢豈人於天地  
之中舉一念行一事而天地有不呼吸相通者乎作善  
降之百祥作不善降之百殃如影隨形如響應谷形谷  
既存而以影響為不可必之數豈不愚昧之甚夫善者  
公而已矣心乎天下國家之謂公心乎一身一家之謂  
私為大臣者誠心乎天下國家之公而不計及一身一

家之私天有不降之百祥者朕信其必無是理然則其  
一身一家之計正復得則兩得也苟心乎一身一家之  
私而不計及天下國家之公天有不降之百殃者朕亦  
信其必無是理然則其一身一家之計亦復失則兩失  
也朕雖深信此理朝乾夕惕不敢刻怠然天下國家之  
事非朕一身所能獨理書曰天工人其代之朕不能不  
賴爾諸王大臣之克代天工則朕固不能已於諄諄訓  
誡爾諸王大臣也人惟無志則不能自立而推諉他人

如為大臣者以天下國家之事為己事身任之而不辭  
一人如是人人如是則內外大小諸務有不事事合宜  
者乎如使內而八旗部院每事諉之叅佐司屬叅佐司  
屬又諉之大臣外而督撫藩臬每事諉之府廳州縣府  
廳州縣又諉之督撫藩臬又或內則諉之於外外則諉  
之於內皆謂主上自有乾斷如此則朕雖朝乾夕惕亦  
何由使事事合宜以仰邀

上天之嘉祥福應乎今歲元旦時雪既有其兆當益加奮

勵朝夕修省以成此瑞慶我君臣其共勉之

雍正十三年乙卯正月壬辰

上諭內閣朕每見天下督撫有司等於人命盜案查審定擬時曲為開脫以行其婦寺之仁意謂寬宥一人可以種陰德於冥冥之中不知君與臣皆任教養斯民之責平時不能殫教養之道使之不陷於重辟在吾君臣已有不得辭之過然尚屬伊等干犯法紀自取其罪國家設立科條原以禁暴除姦使人共守非可枉法市恩是

故刑罰之設乃不得已而然至於水旱災荒天時有不  
齊之數鰥寡孤獨人生有所遇之窮彼寧填溝壑而不  
肯為匪者率皆良民似此無辜之赤子不幸而遭值困  
阨朕以牧養斯民之任寄之天下督撫有司而不能保  
護撫綏登之衽席乃視同秦越聽其饑餓流離此孟子  
所謂受牧牛羊立而視其死者

天高聽卑必加重謹而顧欲於命盜案中曲活一二有罪  
之人以冀倖邀福報何識見顛倒一至此乎朕望天下

督撫董率有司屏棄虛文敦尚實政平時則勸農教稼  
闢地墾荒崇儉黜奢儲糧積粟以立其根本偶遇旱潦  
即據實奏聞殫心區畫俾澤中鴻雁共慶樂郊有此濟  
人利物之功方不負父母斯民之職較之曲活一二罪  
人者相去奚啻霄壤耶至於樂善好施史稱義舉扶危  
濟困人有同心周禮以六行教萬民孝友睦婣而繼以  
任恤可見任恤之道與孝友並重也鄰里鄉黨之間原  
有休戚相關之誼以已之有餘濟人之不足在我本為

不多之費而在人已為當厄之施况民有秉彝自然觀  
感興起衆擎易舉利益孔多從來積善之家必有余慶  
一人行善則慶在一家衆人行善則慶在衆姓果然風  
俗淳良號稱仁里則和氣致祥天道之感應捷於影響  
凡水旱災祲之戾氣悉變為五風十雨之休徵矣然興  
仁樂善者乃鄉隣長厚之風而鼓舞旌揚者則大吏有  
司之責如所屬内有紳衿士庶惠愛鄉閭力行善事該  
督撫等當優禮褒嘉加意培植以表揚之應題請者即

行題請將朕此旨刊刻頒布務使遠鄉僻壤人人知悉

大清世宗敬天昌運建中表正文武英明寬仁信毅大孝  
至誠憲皇帝聖訓卷二十